



LOS ARGÜEYOS

Lugar de nacimientu de los ríos Bernesga, Torú y Curueñu, l'históricu conceyu d'Arbolíu, qu'aportó hasta los nuestros díes como Los Argüeyos, dexó de depender del correxidor d'Asturies a petición propia nel añu 1499.

La Hermandá de Los Argüeyos

El puertu Payares y la Tierra d'Arbas fueron, hasta hai bien pocos años, el llugar de pasu obligáu nel tránsitu de la mayor parte de pasaxeros y mercaderíes ente Asturias y Lleón. La carretera nacional 630, la que diseña ilustráu Xovellanos, dexaba les dos capitales, Uviéu y Lleón, a tres díes de marcha y a día y mediu a caballu. Namás los crudos iviernos sedríen quien a allargar estos tiempos.

Un camín que ya veníen siguiendo dende los tiempos los pelerinos al Salvador, que tomaben pa ello'l desvíu en Lleón capital y qu'aportaben, depués d'una llarga y dura xornada, al monasteriu y agospamientu d'Arbas del Puertu.

Cientos más de caminos y calzaes qu'atrasiesen la cordelera Cantábrica, ente los conceyos d'Ayer y Los Argüeyos. Ente los que destaca, frutu de les caberes investigaciones, la Calzada Romana de La Carisa, que dende Camplongu sube a la Pindiel. La p'atacar el puertu de La Carisa y descender selemente hasta'l llugar de Carabanzu y el pueblu d'Uxo, cruce de tolos caminos que, trespasando la cordelera, aportaben a Uviéu.

Esta condición de tierra de pasu mantúvose buena parte del sieglu XX. La vida ganadera del conceyu d'Ayer y de Los Argüeyos permitió qu'esti intercambi llegara hasta bien pasada la contienda civil. La inauguración de l'autopista del Güerna dexó arrequexada la comarca del gran tráficu. Malapenes agora los montañeros y senderistes, asina como los cazadores y percadores, pueden seguir falando con propiedá de les maravíes d'esta tierra que, pasu ente pasu, de la década de los cincuenta p'alantre fue perdiendo la población a pasos descomanaos. Un exemplu: el pueblu de Vil.lanueva de Ponteó contaba con más de 250 habitantes a primeros de sieglu. Nestos momentos nun sabría dicir si pasa l'iviernu ellí dalgún siquiera.

El continuu paralelismu cola vecina tierra d'Ayer nun dexa d'establecese. Ángel Raimundo Fernández y González publicó nel añu 1966 el so llibru "Los Argüellos: léxico rural y toponimia", yá lo constata falando de la similitú llingüística, que ya recoyera R. Castellanos en "La variedad dialectal del Alto Aller". Pero que, falando de similitúes llingüístiques, nun pue dexar de falase de los llibros "El Habla de Lena", de Jesús Neira, y de "El Habla de Babia y Laciana", de Guzmán Álvarez.

Ya Ángel Fernández comentaba d'aquella l'importante retrocesu que, a favor del castellanu, venía sufriendo'l lleonés falao nestes tierres. Esti retrocesu ya comenzara años enantes cola opción fonética de dir escaeciendo les pronunciaciones más propies, como la de la ch vaqueira: "Así, donde en Aller dicen vatse, los de Argüello pronuncian vache (con una ch claramente castellana) o tienen conciencia de que hace pocos años no era valle sino vache".

La relación con Asturias

En cada ún de los conceyos qu'integren Los Argüeyos naz un de los ríos que rieguen buena parte de les tierres altes de Lleón. El Bernesga, qu'unos kilómetros más abaxo atraviesa la capital. El Torú, que xunte les sos agües a les del Bernesga nes afueres del mesmu Lleón. Y el Curueñu, afluente del Porma. Toos ellos acaben finando'l so percorríu nes agües del Esla.

Tradicionalmente Los Argüeyos taben integraos polos conceyos de La Tercia, La Mediana y Valdel.lugueros. A La Tercia xuntóse-y la Tierra d'Arbas y formaron l'actual conceyu de Rodiezmu. Con too, nos propios nomes de los pueblos, sigue sabiéndose anguaño quien son parte d'una y d'otra. Los pueblos d'Arbas llámense Cubiel.las d'Arbas, Arbas del Puertu, Viadandos d'Arbas, Busdongu d'Arbas... y los de La Tercia llámense Samartín de la Tercia, Fontún de la Tercia, Vilie.la de la Tercia, Mil.laró de la Tercia... Nesta tierra naz el ríu Bernesga y la so capital histórica ye Rodiezmu de la Tercia, teniendo la sé actual l'ayuntamientu na vecina Vil.lamanín de la Tercia.

La Mediana ye agora'l conceyu de Cármes, llugar nel que sigue calteniendo la capital y tierra na que naz el Torú, nel llugar nomáu Los Aguazones. Nos últimos años una carretera asfaltada xunió, a través de Cármes, los tres conceyos de Los Argüeyos. El desvíu hacia L.lugueros gárrase depués de pasar el pueblu d'Almuzara, camín de Valverdín, Pedrosa, L.lavandera y Xenicera. Carretera arriba camín del puertu,

nun trespasa a Asturias, por que queda a 1683 metros d'altor nos puertos de Pedrafita. Falóse durante años de xunila cola carretera qu'abaxa a Morea d'Ayer depués de pasar por Muries y Nembra.

L'últimu de los conceyos ye'l de Valdel.lugueros, que sigue manteniendó'l nome, y que tien por capital L.lugueros. Ye la cabecera del ríu Curueñu y los sos conceyos llimítrofes, agües abaxu del ríu son los perteneciente a la Real Encartación de Curueñu. L'antigua calzada romana, que tovía conserva bien de pontes a lo llargo del so percorríu, ye agora la carretera xeneral que sube al puertu de Vegarada, tamién ensin conectar cola carretera que baxaría a Cabanaquinta d'Ayer depués de pasar los pueblos de Casomera y Col.lanzo. Buena parte d'esti conceyu forma anguañu parte de la Reserva Nacional Mampodre, xunto colos vecinos conceyos de Lillo, na cabecera del valle de Güeñar y de Maraña, de Valdeburón.

El nome de la comarca tien la so mitoloxía particular. La lleenda fala de la existencia d'un arca nel que se guardaben los documentos más importantes d'esta tierra. Esti arca pesllábase con tres argolles, una por cada parte d'esta tierra. D'ehi vien, según la etimoloxía popular, el nome de Los Argüeyos.

Esti arca de les tres argolles desapareció, según dellos testimonios, por mor de la guerra civil. Fuera mandáu construir polos Reis Católicos y nel se conservaben documentalmente los fueros y privilexos d'esta tierra.

Otra de les lleendes convierte estos pueblos en tierra de condenaos que llevaban argolles al cuello. Un vecín me contara que muchos d'estos pueblos repoblárense colos galeotes que yá cumplieran condena. Los documentos falen de los estrechos valles d'esta tierra, poblada tantes veces por malfechores y asaltacaminos. El citáu llibru d'Ángel Fernández recueye enforma d'estos documentos, testigos de la dureza d'esta tierra y de la vida de les sos xentes.

Documentalmente, el primer nome que sirve pa nomar esta comarca ye'l d'Arbolíu, del que derivó posteriormente'l de Arbuellu, pa finir dando'l qu'aportó hasta los nuestros díes.

A pesar de la so proximidá a Lleón, de los documentos anteriores al sieglu XVI deduzse que dependía del Correxidor d'Uviéu. Depués d'una llarga serie de pleitos, por mor de varios señores dueños de les tierres y vinculaos a Uviéu, los vecinos de Los Argüeyos soliciten el pasar a pertenecer al Correxidor de Lleón, lo que consiguen el 4 d'ochobre de 1499, según consta en documentu firmáu por Isabel la Católica en Granada.

Con too, la relación con Asturias sigue perdurando a través de los años y sobre too caltiénse gracias al oficiu de l'arriería, que conservaron los habitantes d'esta tierra hasta bien acabáu'l sieglu XIX.

Nel añu 1937, en plena guerra civil, l'Asturies republicana organizóse como Conseyu d'Asturies y Lleón. El Lleón del que se falaba naquellos momentos nun yera otru que pocu más que la tierra de Los Argüeyos. El fechu de ser durante bien de tiempu llinia del frente fizo que cásique tolos pueblos d'esta tierra quedaran quemaos y los techos de les sos cases fundíos, lo que facilitó'l rápidu abandonu d'esta tierra por parte de los sos habitantes nos años siguientes: los años de la fame. Sobre'l so llombu escribióse buena parte de la historia de la minería asturiana.

L'arquitectura popular

Enantes d'apienar a falar de les amueses interesantes de l'arquitectura popular d'esta tierra tien de tenese bien presente l'anotación anterior sobre l'importante destroz que dexó tres de sí l'episodiu de la guerra civil.

Ye un exemplu la imaxen actual de Vil.lamanín de la Tercia, el pueblu más conocíu de Los Argüeyos por ser hasta hai bien poco parada obligada nel pasu del Payares nos duros meses del iviernu y, tamién, llugar nel que pasaron los branos ("a secar") tantos vecinos de les cuenques hasta los nuestros díes. Les sos cases blanques, la moderna ilesia, el propiu ayuntamientu y tantos otros edificios, podríen pertenecer como modelu arquitectónicu al mesmu sur d'España. Nun son más qu'el testigu de la desolación que dexó tres de sí una dómina.

Los materiales de les construcciones son los propios de la tierra: les muries de piedra, les estructures de madera y los teyaos de teya. Les cubiertes vexetales conserváronse hasta hai bien poco en dellos pueblos de la Tierra d'Arbas y nun queden testimonios de la so presencia en Los Argüeyos. Nin siquiera nel pueblu de Piorneo, al que-y daría nome la planta del piornu cola que se reteyaben les cabanes y les cases.

Les muries de piedra son de mampostería curiada, colos esquinales trabayaos en sillería. De grandes llábanes de piedra son, tamién los quicios de les puertes y los portones. Vense enforma puertes

con arcos de mediu puntu, más que nada nes principales casones de la nobleza de los siglos XVII, XVIII y XIX.

La casa tradicional, al ser de dos altores, tenía'l llar, un cuartu y la corte na baxa, quedando la d'arriba palos cuartos y el pagar (esti siempre sobre la corte). Amás solía contar con una especie de corte/almacén, amestada a la casa, na que se guardaben los preseos, los carros y les caballeríes, polo xeneral. Nesti casu, nel de servir d'abellugu p'animales, tamién solía tener un pequeñu pagar na primer altura.

El correo vuelve a ser la seña d'identidá d'estes cases. Un correor que varía nes cases según pasamos de la Tierra d'Arbas a Los Argüellos más orientales. Na primera sigue viéndose'l patín, o escaleres esterores a la casa, como manera d'aportar al correor. Pa, en La Mediana y Valdel.lugueros, dase'l correor como simple balcón de fachada. La solución cola que más nos topamos anguañu, la del correor convertíu en galería acristalada, ye de factura moderna.

La publicidá turística diríxenos a visitar el vecín llugar de Correciellas, na Real Encartación de Curueñu. Pero, hai bien de pueblos en Los Argüeyos que nun desmerecen una nada d'afayase ente los más guapos y los que meyor conservaron l'arquitectura tradicional d'esta tierra.

Nesti sentíu, Valdel.lugueros cuenta con verdaderes maravíes. Mesmo apienzando pola so capital, L.lugueros, y la so seña más identificativa, la ponte sobre'l ríu Curueñu. Asina, los pueblos de Valverde o Valdeteya, coles sos galeríes acristalaes, o los interesantes conxuntos del valle de L.labias, afluente del Curueñu nel mesmu L.lugueros, colos pueblos de L.lamazares y Redil.luera. Como tamién el llugar de Ceruyea, bien conocíu por tolos amantes de la montaña al contar ellí con un albergue ún de los principales grupos asturianos.

La Media caltuvo los techos vexetales hasta la guerra civil. Cármenes ye un exemplu d'edificaciones de modelu urbanu de finales del XIX y primeros del XX, onde destaquen los sos balcones volaos, les galeríes acristalaes y los miraos. Una visita a fondo del conceyu nun pue dexar atrás los llugares de Xetino, Cansecu, Felmín y Xenicera (pola so ilesia enriba d'una llomba arrodada d'una muria de piedra a modu de defensa).

La güelga más profunda de la guerra civil queda en La Tercia. Citaba enantes el casu del pueblu de Vil.lamanín de la Tercia, reconstruyíu pola Dirección Xeneral de Rexones Devastaes. Asina, los meyores exemplos del caseríu afáyense na Tierra d'Arbas, y sobre too nos llugares de Casares d'Arbas y Viadangos d'Arbas, como tamién en Camplongu d'Arbas. Ensin esacaecer una visita la impresionante monasteriu d'Arbas del Puertu, parada obligada de pelerinos.

Exemplos de destrozos urbanísticos atópense en cualquier llugar. El xalé de construcción modernu campa a les sos anches. Con too, un exemplu evitable acaba dase estos últimos años nel pueblu de la Pindiel.la d'Arbas, que conservó hasta hai bien poco, en perfectu estáu de conservación, l'empedráu tradicional. La falsa modernidá llevó a pavimentar d'hormigón buena parte de les sos caleyes. Lo que yera un pueblu cásiqúe únicu, convirtióse en nada nun llugar más, ensin nenguna seña d'identidá con interés propiu.

Imáxenes d'una tierra

Una buena manera d'averase a esta tierra ye a través de llibros como los dos de la saga "Arbolio: memoria gráfica", que recueyen les histories más cercanes del paisaxe y del paisanaxe de Los Argüeyos (n'especial de La Mediana).

Recueyen los sos autores, Ángel Fierro y Fulgencio Fernández, bien de lleendes. Munches d'elles siguen siendo testimoniú corriente de la xente mayor según apares nos pueblos. Llugaes a los que namás aporten de xeemes en cuando visitantes y a los que los vecinos de los pueblos reciben de buen agradu, anque namás seya pa poder cruzar un saludu y unes palabres.

La mesma toponimia trai a la memoria de los vecinos y a la conversación col visitante delles de les histories más recurrentes, les de los propios orixenes. Asina, ye'l dios Thor el que da'l so nome al Toríu. Lo mesmu'l que la divinidá céltica Bodo lu da a les dos elevaciones nomaes Bodón, una sobre Valverde y otra sobre Valverdín (¿quién nun vería equí aina una estraña coincidencia?). Como, tamién, los vieyes muyeres de la mitoloxía astur, les Llavanderes, que daríen nome al pueblu de Llavandera.

Los moros, per una parte, y los mozárabes, per otra, vuelven a de xar alcordanza del so pasu en llugares como Almuzara y como la mesma Cármenes, del árabe Carme (o del llatín Carmen), que falen d'una tierra de viñeos (o d'un xardín). Toponimia que tamién se dexar ver nel puertu de Moroquil.

Cuéntase tamién que, hasta hai bien poco, en Xete conservóse la lliturxa del ritu mozárabe na so ilesia. Esto significaba que, n'ocasiones contaes a lo llargo del añu, el cura permitía a los sos vecinos cantar na ilesia les antigües melodíes. Lo que se caltuvo hasta la muerte del cura párrocu Matías Fierro, en 1947. Ángel Fierro y Fulgencio Fernández recueyen la memoria del rescate del antigüu Credo, grabáu a Francisco González, únicu vecín del pueblu que recordaba la vieya melodía.

Tamién en Xete, el 7 de septiembre, celébrase la fiesta de la Pandiel.la, procesión de la Virxen dende la ermita del Pandiel.lu hasta la ilesia de Xete. La procesión entama al escurecerín, allúmase con velones y déxense sentir vieyes lletaníes en llatín. Siempre fue esta fiesta la celebración por escelencia de los pastores de Los Argüeyos. Esta fiesta dexó de celebrase a mediaos de los sesenta.

Anque, quiciás, la llenda más conocida de tola comarca, y cásique de Lleón enteru, seya la de la dama d'Arinteru. El romanceru popular recuérdanos la so hestoria. La d'un padre que nun tuvo más que fíes y, a la más pequeña, entró-y la inclinación de dir a servir al rei vistíu de varón. Por más que'l padre-y quixo quitar la idea de la mollera, la fía acabó al freste de les tropes del rei. De regresu a casa, descubiertu'l fechu de ser muyer, pero atacada de honores polos sos fechos de guera (el romance popular llega a afirmar qu'el mesmu rei se namorara d'ella), morriera a manes d'unos asaltantes poco enantes de llegar a la so casa, nes tierres de la vecina La Vecilla. Nel pueblu d'Arinteru un escudu recuerda'l solar de la famosa dama.

Hai pueblos, como Xenicera, polos que cuerren cientos d'histories. La de los mesmos torreones defensivos colos que contó'l pueblu y de los que llegaron hasta los nuestros díes vestixos de tres d'ellos. La mesma ilesia, d'aspectu amuralláu, ye un claru exemplu. L'alcordanza d'esti pasáu vinculáu a la vida militar queda na famosa Diana del Cristu, pasucais que se celebra al amanecerín del 14 de septiembre y nel que se dan cita tolos vecinos del pueblu. Casa por casa percuérrese'l pueblu enteru pa tomar la parva, un buen tragu acompañáu de pastes o embutíos.

El vezu del Conceyu Abiertu tuvo vixente hasta bien entráu'l sieglu XX. Nel Llibru d'Actes de Cármenes refléxase como l'últimu d'estos conceyos, siguiendo les ordenances antigües, tuvo llugar el día 4 de payares de 1969. El rexidor convocaba a toque de campana a los vecinos del pueblu: el cabeza de familia de cada casa o, nel so defectu, el fíu mayor.

El mesmu fechu de qu'hasta feches tan recientes se caltuvieran vezos tan arcaicos fai que tamién llegara hasta los nuestros díes otres tradiciones, como la de la facendera, la espalada, la borregada o les piticiones.

Les facenderes decidíense en conceyu abiertu y convocábense a toque de campana, y nelles llamábase a los vecinos a "dir al camín", o lo que yera lo mesmo, a facer el trabayu comunal de llimpieza y conservación de los caminos.

Cola espalada, cuentes los vecinos, acabó'l buen tiempu, ya qu'en tolos llaos cuenten que ya enxamás volvió a nevar como d'avezu nevaba nestes tierres. Cuando la campana tocaba a espalada, en pelnu iviernu, los vecinos tiraben de pala p'abrir el camín y comunicar el pueblu col pueblu vecín. Anguañu, les principales vías de comunicación cuenten col serviciu de pala quitañeves y los caminos, abandonada la espalada, permanecen meses enteros cerraos pola ñeve.

La borregada vien del vezu de los pastores de xuntase enantes d'emprimir el camín de regresu a les sos tierres d'Extremadura, nos tiempos de la treshumancia. Tovía anguañu se celebra esta fiesta en pueblos como Pedrafita, Cármenes, Cansecu y Xenicera.

Per ultimu, llamábense piticiones a les colectes que se facíen de casa en casa por mor de dalgún problema puntual que surdiera. Asina la pitición pal llobu consistía nel pasáu polos pueblos d'un llobu muertu y sirvía pa recompensar al cazaor que-y diera muerte. O, la pitición pa casa quemada, cuando se daba'l casu d'una desgracia a un vecín por esti motivu.

Vezos, toos ellos, que demuestren la importancia de la vida comunal d'esta tierra y que, la guerra civil, per una parte, y el despoblamiento posterior, per otra, terminaron arrequeándose na memoria de los mayores y acabaron, en buena parte, morriendo con ellos.